



7. marts 2022

UPA 2022/125

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara::

Meeqqanik kinguaassiuutitigut atornerluisartut pillaatisinikunut nakorsartinnikkut kinguaassiuutitigut atuinissamut piumassusaarutsitaanissamik (medicinsk kastration) aammalu meeqqat kinguaassiuutitigut atornerlugaasimasutut sullinneqartunut tarnikkut ikiorserneqarnermut aningaasartuutit tamakkiisumik akiliisinneqartalernissaanik pisussaaitaasalernissaanik pillaatissalernissaat pillugit oqallisissiatut siunnersuut.

(Inatsisartunut Ilaasortaq Nivi Olsen, Demokraatit)

Tungavilersuut

Una oqallinneq alianartuuvoq. Kisiannili pisariaqarpoq. Nunatsinni amerlavallaat kinguaassiuutitigut atornerlunneqartarput. Killissamik qaangiinerit amerlasuunut inuunerup sinneranut tarnikkut ikiliisartoq. Ilaatigut atornerluisoq akisussaaffimmik tigusitinneqartarpoq pillaatissarlunilu. Pillaatissereernerullu kinguninngua kinguaassiuutitigut atornerluisartoq anisinneqarqittarpoq, ilaatigullu pineqartoq nutaanik kinguaassiuutitigut atornerlueqqittarluni. Tamanna eqqarsaatigisasillugu ajorluinnarpoq.

Meeqqagut kinguaassiuutitigut atornerluisartunut illersornerusariaqarpagut, meeqqat tamarmik pisariaqartitaat assigalugit toqqissillutik inooqataanissaat pillugu.

Ullumikkut imaappoq kinguaassiuutitigut atornerluisartoq nammineq aalajangigassaminik periarfissaqartarluni nakorsartinnikkut kinguaassiuutitigut atuinissamut piumassusaarutsitaanissamik. Tamanna kissaataannaasinnaavoq kaammattuillunilu kinguaassiuutitigut atornerluisartut tamarmik periarfissaq tamanna atussagaa, perusunnerat taamaasilluni aqunneqassalluni. Tamannali naammappa? Kinguaassiuutitigut atornerluisartut ikittuinnaat aqqiissut tamanna atortarpaat. Politikkip tungaaniik ammaattariaqarnerlutigu eqqartuussiviit kinguaassiuutitigut atornerluisartut nakorsartinnikkut kinguaassiuutitigut atuinissamut piumassusaarutsitaanissamik pillaaasinnaanngortillugit?

Ullumikkut kinguaassiuutitigut atornerluisartut pillagaanertik ingerlappaat. Iperagaanissaannut piumasaqaataasinnaanerluni, taakku pinerluuteqartartut nakorsartinnikkut kinguaassiuutitigut atuinissamut piumassusaarutsitaanissamik?

Aalajangiineq sakkortuvoq. Ilaasa inuit pisinnaatitaaffiinik eqquutinngitsutut isumaqarfigissavaat. Inuit pisinnaatitaaffii soorunami ataqqissavagut. Kisiannili aamma meeqqat inuiaqatigiinni toqqissillutik inuunissaannik pisinnaatitaaffii aamma ataqqsariaqarpagut, kinguaassiuutitigut atornerlunneqarinnissamik ernummassuteqartariaqarnatik. Uannut meeqqat isumassorneri inituneruvoq, kinguaassiuutitigut atornerluisartut isummerfigineraniik. Eqqartuussiviillu sakkussaqarnerunissaat kissaatigaara, kinguaassiuutitigut atornerluisartut pillarniarnerini imaluunniit pineqaatissinniarneqarnerini.

Soorunami nakorsartinnikkut kinguaassiuutitigut atuinissamut piumassusaarutsitaanissamik ullormiit ullormut atuutilersinneqarsinnaanngilaq. Naalakkersuisut pissutsit atuuttut misissoqqissaaqqaartariaqassavaat. Nunani allani qanoq isikkoqarpa? Maannakkuugallartumik medicinsk



kastration USA-mi, Sydkorea-mi, Ukraine-mi allallu ilanngullugit inatsi atuuppoq.¹

Nakorsat tungaaniimmi ilisimatusarnek? Inuimmi pisinnaatitaaffii? Eqqarsaatigisariaqakkagut amerlapput. Kisiannili aamma; isumaqarpunga takusariaqaleripput qanoruna meeqqagut illersornerpaasinnaanerigut.

Uanniillu naqissuserusuppara meeqqat kinguaassiuutitigut atonerlunneqarsimasut inuunerup sinnerani tarnikkut ikeqarput. Uanilu inissaminiiginnassaaq atonerluisup eqqugaasoq professionaaliusumik ikiorserneqarnissaa, tarnip nakorsaanik oqaloqateqarnikkut imaluunniit tarnikkut katsorsaariaatsit allanik ikiorserneqarneranut akiliuttassallugu. Periarfissaq tamanna ilaannakortumik maanna pioreerpoq. Kisiannili naammaatumik atorneqartarpa? Inatsi sukaterneqartariaqarnerluni pinerluuteqarsimasup tarnip nakorsaanut, tarnip nakorsaanut angalaneq eqqugaasimasumulluunniit angalaneq ilanngullugu, aningaasartuutigineqarsimasut tamarmik akilernissaanut inissaminiilluni?

Isumaqarpunga kinguaassiuutitigut atonerluineri kingunerisaanik inuunerit amerlavallaat aserorsimasut. Isumaqarpungalu aamma inuiaqatigiittut pinerluuteqarsimasoq immikkut aallutarivallaaripput, eqqugaasimasorlu immikkut samminagu. Naatsumik oqaatigalugu; allat inuunerannik atonerluisimasunut aseruisimasulnulu kinguneqartitsisarnerit annikippallaarput.

Naqissuserusuppara imaanngisaannassammat politikkerit kinguaassiuutitigut atonerluisimasunut pillasassasut imaluunniit pineqaatissiisassasut. Taamaallaat eqqartuussivinnut sinaakkutinik periarfissanillu suliaqarsinnaavugut.

Tamarmik ataqqinnillutik oqallilluarnissaannik kissaappakka.

¹ <https://www.trtworld.com/magazine/besides-pakistan-here-are-five-other-countries-with-active-castration-laws-51778>